

閩

詩

錄

閩詩錄丙集卷十

侯官鄭杰原輯

侯官陳衍補訂

蔡

勘補

勘字定夫莆田人襄之後乾道二年進士除

祕書省正字知江陰軍

題盱眙

自古東南第一山于今無異玉門關亂雲衰草蒼茫
外赤縣神州指顧間擊楫何人酬壯志凭闌終日慘
愁顏中原父老應遺恨祇見羶車歲往還

錦繡萬
花谷

曾懷補

懷字欽道晉江人孝寬曾孫建炎初為金壇簿知真州乾道初賜同進士出身參知政事拜右丞相封魯國公奉祠卒

恭和御製玉津園宴射

名園佳氣靄非煙冠佩朝宗似百川五品並令陪宴射四鍤端欲序賓賢恩涵春意魚翻藻威入秋聲雁落弦竣事更容窺典雅宸章應陋柏梁篇

夢梁錄云城南玉津園在嘉會門外四里紹興四年北使來賀天申節遂宴射其中孝廟常臨幸命皇太子宰執親王侍從五品以上官及管軍官講宴射禮孝廟御製詩宰臣曾

懷恭和云云

俞

豐

補

豐字應南建甯人乾道二年進士官至吏部
侍郎號雲谷著有雲谷集

鳳山

老樹蕭蕭吹古風滿階落葉鳴寒蛩插天殿閣雲不
鎖挺柱石筍擎太空鳳去臺空秋寂寂瑤草離離自
青碧玉簫吹徹渺遺音十二闌干空月色

邵武府志

蕭國梁

補

國梁字挺之永福人乾道二年進士第一著

有集句詩

句

名傳玉陛星辰曉澤霈金枝雨露春

宋稗類鈔云獬峯蕭公登科歲第一人本丞相忠定趙公故事設科以待草茅士凡豫屬籍挂仕版者法當遜避唱名日遂陞蕭為榜首故蕭對御吟云云其謝啟云預飛龍之選淮安論次以當先無汗馬之勞鄴侯何功而居上蓋用宗室及蕭氏事人多稱之

黃鵬舉

補

鵬舉福清人乾道二年進士

黃漿山

清泉澈底瑩無泥喚作黃漿恐未宜若見洞仙還寄

語佳名當喚碧琉璃

新江西通志

林宗臣 補

宗臣字實夫龍溪人乾道二年進士終主簿

丹霞峰

笑憑詩句說丹霞城郭人民數萬家里接紫陽風俗

厚學傳鄒魯道源賒

福建通志

林 彖

彖字商卿號萍齋仙遊人乾道四年特賜同

進士出身授興化軍教授有萍齋集

案徐典公筆精云林彖工詩乾道閒詔舉遺逸起家為迪功郎仙遊法華庵是其隱處

案宋詩紀事補遺小傳云僑居真州得事劉安世陳瓘任伯雨諸公紹興初奉母歸閩終母喪不謀婚娶寓迹法華庵所居軒曰聽雨小園日意足孝宗初兩召不赴

九座閒咏

短短桃花點綠莎
輕輕白鳥下晴波
宛然西塞江邊路
不見詩人張志和

龍華晚望

喜鵲寒鴉噪晚田
山前茅舍起炊煙
小橋敗葉風頻掃
斜月平蕪犢自眠

三會閒行二首

風搖麥隴東西浪
春入郊原遠近花
閒趁溪流到村

曲斷垣古木兩三家

溪上橫岡一徑斜
成行鴛鴦落平沙
竹籬茅舍林中
見彷彿孤山處士家

鄭 僑

僑字惠叔莆田人乾道五年賜進士第一官

至參知政事進知樞密院事求退除資政殿

大學士知福州以太師鄒國公致仕謚忠惠

蘭陔詩話云公居二府端重清靜不市恩不
植黨不私好惡使金時值金主寢疾館伴趣
令就東上閣門進書公捧書屹立扼守不可
乃傳命遣回可謂不辱君命矣

題夾漈草堂

杪秋尋遠山幽懷鬱冲仲草堂跨層崖夕陽山影空
高人辭天祿結交杖藜翁遊氛暗九土歲晚余曷從
泠泠夾深水謾謾長松風思之不可見淚落秋雲中

黃景說

補

景說字巖老號白石閩人乾道五年進士嘉

定中直祕閣知靜江府有白石丁稿

鶴林玉露云姜白石黃巖老學詩于蕭干巖巖老亦號白石詩亦工時人號雙白石云

梨嶺遇雨

黑風吹雨又黃昏雞犬數聲何處村身在嶺雲飛處

溼不關別淚濺成痕

詩人玉屑

許 巽補

巽字少陽莆田人乾道五年進士知歸善縣

遷祕書郎

梅峰

一峰突兀倚天際千嶂龍蔥在眼中宇宙自偏人世

遠塵埃不到佛樓空主公真得庵居相俗子那容線

路通山北道人如口市雲門臨濟各家風興化府志

王 揆補

揆尤溪人乾道五年進士

游黃山留題

地靈山秀景清虛健羨游人與有餘黃葉盡時分疊
嶂白雲深處見精廬去同靈運低前屐回與浮邱攬
右裾自歎塵勞羈鞅甚林泉高趣若相疎

黃山志

黃艾

艾字伯耆莆田人乾道八年賜進士第二累
官中書舍人刑部侍郎終待制有止堂集

九鯉湖

九鯉山頭爽氣芬潺湲九澗隔溪聞青嶂高障海東
日碧溪流穿湖曲雲坐聽猿聲憐草閣夜深月色度
松門無緣能結茅齋宿綠水丹山欲共分

陳士楚

士楚字英仲莆田人乾道八年進士官至宗
正丞兼嘉王府直講除侍講

蘭陔詩話云公爲文節高第林希逸守莆祠
文節于穀城山以公侑亭云

和林艾軒國清塘韻

山光一洗紅塵眼長松夾道搖青繖回頭下瞰百川
溶亭皋小立凌剛風傑閣玲瓏朱綠戶何年蓬萊移
左股山僧見客不斂眉梵唄琅琅應魚鼓欲携三尺
彈龜山淳風一去不復還仞墻草長章逢少幾百年
來風月閒嗟哉賢聖遠復遠天高地下日易晚

興化府志

劉

燭補

燭字晦伯建陽人受學晦翁東萊之門乾道八年第進士甯宗朝累遷國子司業奏乞罷偽學之禁擢權工部尙書兼太子右庶子卒諡文簡有雲莊外集

金國賀正旦使人到闕紫宸殿宴

榆關玉塞靜無塵嘉定于今第四春兩國交馳通好使八方同作太平人翠巖鼓奏娛嘉客白獸樽浮賞諫臣聖歷欲茲天共遠年年玉帛會楓宸

瑞慶聖節集英殿宴

皇家卜世過周唐天啟真人應運翔抱日預占恭邸
夢飛龍曾報皖山祥翠雲影外來金母紅霧香中擁
玉皇樂府賦工無以祝願將金鑑代珠囊

皇帝閣春帖子

東風昨夜入簾帷便覺深宮漏影遲一曲涼州花盡
放不須更作報春詩

以上雲
莊外集

歐陽光祖

補

光祖字慶嗣崇安人乾道八年登第後爲江
西轉運歸休松坡之上

贈篆書吳全仲古風

鄉友吳全仲讀書之暇工大小篆一日別予游江
右於其行歌以贈之

黃帝史倉初作書依類象形書亦疎獸蹄鳥迹頗奇
怪乾端坤倪微發舒周籀大篆十五篇體製漸與蒼
史殊秦兼七國有天下混一土宇同書車趙高爰歷
競新作胡母博學誇宏樞是時小篆方挺出蒼籀字
畫勤芟除雲陽繫囚變隸體

程迥

世喜簡便爭奔趨人

文日巧偽日勝古意自此皆荒蕪嶧山野火惟焦蘇
苦縣光和碑亦無宣王石鼓後來出真贗莫訂徒嗟
吁陽冰凜凜及前輩字骨瘦硬中敷腴潮乎下筆亦

清切杜陵謂與李蔡俱寂寥恍已隔千載遊心藝苑
惟長驅我朝巨筆惟章徐武夷近數延陵吳吳君心
近覩天巧瘦不露骨肥不麤小字銀鈎鐵畫如大字
龍蛇相鬱紆上窮羲黃下秦漢倚撫彝鼎并盤盂知
音惜無浣花老侯門欲曳鄒陽裾觀君行矣勿留滯
識真四海多通儒莫學婦人寫陰符莫作奇字索酒
沽摩崖他日頌功德大字深刻真良圖

截江網

句

白髮駸駸吾老矣名場從此欲投簪

贈朱元晦
崇安縣志

廖德明補

德明字子晦南劍人受業朱子之門登乾道
進士歷官吏部左選郎官奉祠有槎溪集

鬱林郡城

荒煙漠漠雙江上往事悠悠野戍孤
春到偏臨青草

渡夢中猶記白鷗湖

粵西詩載

林淳補

淳三山人乾道八年以嘉議郎爲涇縣令修
復古塘民多稱之

琴溪

湛湛長溪水飛橋遠近通客喧墟市合仙去釣臺空

欲辨磨崖字忽聞遵渚鴻僧無贊公趣誰與論崖中

甯國府志

方信孺

信孺字孚若號柴帽山人莆田人乾道中以
父廕授官累遷淮南轉運判官兼提刑知真
州建言奪三秩奉祠卒有桂林甲乙丙三集
擊缶編壽湖稿淮南稿南海百咏南冠萃稿
南轅拾稿曲江嘯咏詩境集九疑漫編

劉後村序云公詩文操簡立成宮羽協諧經

緯麗密桂勝畧云信孺大節在宋史自道州擢為轉
運判官父松卿先為運判甚有治聲桂人祠

之及信孺至大為增繕請吳獵紀其事莆田
 柯夢得撰迎送神曲其褒揚先漕如不及人
 以為篤孝他日于西山擇最勝處創起館宇
 期欲奉母偕隱名所營曰碧桂山林自為之
 銘其文今向在山中又愛琴潭水石題以示
 志曰吾何得此為荒蕪之地乃灘山雲崖則
 親築軒于崖之陽乘輿獨往往則必留曾語
 守軒僧了真曰先祠在永甯此去不遠庶幾
 神靈謂不肖孤在近或喜得暫依也閒屏騶
 從小休軒下伸紙濡毫有所撰述不多時草
 具當其得意處望崖而嘆曰平生方提刑以
 好山水聞孰信茲山寓筆硯哉
 蕭咳詩話云公少有雋才為周益公揚誠齋
 所器性豪爽揮金如糞土所至賓客滿其後
 車年三十使金以口舌折強敵既齟齬歸築
 室巖實自放于詩酒著作等身今已少流傳
 莆陽全書僅載三律予購得南海百咏一帙
 字迹半已漫滅錄其可辨識者得十餘首以
 傳

水簾洞

碧澗東西春水添
四時疎雨落晴簷
珠宮貝闕無尋處
空見重重挂玉簾

鶴舒臺

安期飛昇處

危臺老石倚層巔
鶴駕逢迎不記年
今日歸來應一笑
山川城郭尙依然

流杯池

白石參差水曲流
飛觴寂寞幾春秋
山陰千古誇陳迹
此地何人記舊遊

劉王墓

劉鋹

龜趺無處問行蹤惆悵連江荔子紅鐵鑄崔嵬真大
錯驪山銅柱久成空

甘溪陸公亭 吳判史陸亂建

甘溪依約舊城東陵谷遷移一夢中春盡踏青人不
見桄榔老大木棉紅

花塢 僞劉建

綠陰到處小舟藏淺水漂紅五里香不見芳華舊亭
院桃花應解笑劉郎

石屏堂 僞劉時端午令
宮人競渡其下

月峽旁通玉液池綵舟爭勝出宮闈荒臺今日人相

問野草無言日自西

花田 劉錕葬宮人處

千年玉骨掩塵沙
空有餘香入此花
何似原頭美人草
尊前猶作舞腰斜

題龍隱巖

春波飽微綠斗柄函空明
方舟貫巖腹鷺鶴相酬鳴
俯窺穹窿頂宛轉百怪呈
僅餘鱗甲碎不見頭角猛
下闖清泠淵演迤萬頃澄
但同魚鳥參勿遺蛟龍驚
挾苔撫奇篆倚棹看題名
三將標殊勳自與山不傾
誰歟贅小築政恐山靈嗔
南澗更幽絕仙佛依崢嶸

太虛可爲室豈復資藥楹乳泉助茗椀中有冰雪清
何須驂鸞去此卽白玉京鼎來不速客抱琴忽遲迴
愛此無絃曲巖溜同一聲爲君洗塵耳喚我詩魂醒
祇愁白衣到好句無由成

桂州黃潭舜祠

西風攬桂樹落日明楓林遊子懷歸期余悲渺登臨
虞山一何高湘水一何深英皇僅枯冢寂寞薰兮琴
我欲奏古曲俗耳更洼濞古器不可見聊作相思吟
相思長相思相思無古今一歌衆鳥聽再歌萬籟音
推手君勿歌有酒且孤斟落落此時意寥寥千載心

五絃勿庸絕四海誰知音

案以上曹氏
歷代詩選

題雲巖軒

不用窮探費杖藜
隱然林壑挾城陴
曾遵月洞千巖上
更著雲巖一段奇
拂拭軒窗容俎豆
發揮泉石借聲詩
瞿曇頗似知人意
已約梅花帶雪移

玩珠巖

歸舟多載小江春
重訪東巖舊履痕
插水峭崖猶有路
垂天怪石本無根
金華仙伯眞知已
蕙苴將軍足斷魂
安得北山公可作
倩渠移取向家園

方士繇

士繇字伯謨號遠菴莆田人乾道中布衣有

遠庵類稿

蘭陔詩話云遠庵從朱文公遊年甚少學甚敏不數年遂爲高弟紹熙閒文公門人有至行在者公卿延致恐後遠庵聞之嘆曰異時必爲學者禍未幾學禁果作其先見如此不甚學詩閒有所作寄情蕭散

武夷丹崖

丹崖石氣凝高秋碧溪上引天河流金堂石室不可到玉館莓苔生古愁仙人昔乘紫雲氣白馬瑤鞭在何處茫茫塵世那得知幔亭空記當年事君不見茂陵松柏已蕭疎乾魚猶祭洞亭祠

寒樓館

蒼崖凌紫霄橫席坐高迥清夜有吹簫山空月華冷

昇山卽事

一徑西風裏閑房客未歸砌苔侵野屐林葉上秋衣

黃卷經心嬾青綸入夢稀還書報妻子莫厭故山薇

詩林

萬選

林亦之補

亦之字學可福清人自號網山山人月魚一作

漁氏從學艾軒林光朝之門趙汝愚帥閩嘗

以亦之行業上於朝景定間贈迪功郎私謚

文介先生

劉後村跋云網山律詩高妙者絕類唐人
宋百家詩存小傳云初艾軒講學於蒲之紅
泉學者常數百人稱高弟必曰網山艾軒卒
網山繼其席從遊之眾無異艾軒也淳熙十
二年卒子名簡字伯綺客死其後遂絕網山
月魚集三卷蕭翁林希逸爲序云月魚據稿
梧吟空山生無一事如其意年才五十死
未五十年而子孫餅盜不守松楸且幾禿亦
可悲矣

和李監倉諤欲遊龍卧山以海風大作不果

枉蒙龍卧篇如睹藤蘿境十年招隱士欲到此山頂
坐石誦離騷羽水弄清影無人同荷鋤長愧林下景
昨者逢李侯一笑便歡領爲言有明月公事且暫屏

騎驢學賈島捫蝨喚王猛雙鑣雲外來斜帽不須整
夜投招提宿聽雨寒更永論文到昌黎說詩笑匡鼎
悶人數日風何時發深省

丁亥九月十六夜偕李監倉宿龍卧山中聽雨
看月同時事也所謂魚與熊掌兼得之賦此
以紀其事

相喚此山來狂風吹我衣把酒桂花下山雲片段飛
掩門雨初滴開門月旋上倚樹看月明半山聞雨響
人間有佳景詩句頗發越何曾似今夕聽雨還看月

草堂同爨呈稚春

雲錦堂前花作堆尋幽養靜屬吾儕高高下下黃柑
樹曲曲斜斜碧草堦數點遠山如越縣一條寒水似
秦淮龐公父子能留客我亦三年忘客懷

陪范明府與諸同官飲新亭是夕以莞爾榜之
因賦此詩

把燭新亭下迂疎聊爾歌酒緣人品勝官要野情多
燕豆客俱好漁竿人亦過誰知武城笑深自惜蹉跎
瑞峰院夜話奉酬鄭簿

百級上層巒呼鐙同所歡甕杯真有道行李似無官
妙語勝熊掌疎才愧鷓冠古人相見意不作酒肴看

翁丈柔中同姪昭文相訪留兩日旣別贈以詩
委巷無過客明燈迎此翁歡欣展齒折羞澀酒餅空
燒芋隨家法論詩到國風胡麻煮清棗更擬故人同

憶浮家洞

萬竹蒼蒼烏鳥啼一江渺渺薜蘿西幽懷動處蘭初
長好句來時月已低年歲卻從爲客盡家書長是倩
人題疎鐘日落孤村立秋燕梁空歸思迷

寄表弟章由之爲理曲堆屋廬

苦來爲客竟何爲宅舍荒村誰與治別墅雖無輞川
畫生涯堪入杜陵詩身如燕子年年去家似漁舟處

處移丹井西頭曲堆下更煩歲晚補疎籬

同安撫趙子直汝愚餞朱晦菴於懷安得重字
祖帳寒梅白未空已看新葉綠重重八州斧鉞送行
客十里旌旗遶暮峰北斗獨高韓吏部南州爭慕郭
林宗一時賓主俱豪傑敢道招要到野農

魏

几補

几字天隨福清人從林光朝學

句

丹霞夾明月半自在梨花福州府志

鄭

鑑補

鑑字自明連江人淳熙元年太學釋褐累遷

太子侍講終宣教郎知台州

香爐山 在連江縣

峙立交輝紫翠閒疎簾半卷鎮長閑神仙似有祈年

術一縷青煙起博山 淳熙三山志

林夢英 補

夢英字伯虎閩清人徙撫州游陸象山之門

登淳熙二年進士歷祕書丞學者稱山房先

生

金石臺

雲作巖扉風自關清陰半壑樹中間傍廂更著茅亭
好放入西南一面山

江西通志

碧澗書堂

臨川遇鄒君示我銅陵辨相邀游其閒百聞須一踐
自從雙耳聾已辦兩足繭武夷乃招隱仙都輒策蹇
遙睇麻源村夢思勞輾轉今披碧澗記華岡訂訛舛
疑信吁莫論是非爭之褊但欣泉石奇堂成書可葺
晁侯雲夢胸妙處參墳典家有萬竹坡琳琅閎營翦
徘徊康樂舊此興尤不淺人生貴自得假物非至善
山川侈遭逢所託各偕顯嚴光釣越灘叔子登楚峴

氣象不低摧吾徒志當勉相思邀未到煙霞自舒卷

唯應原上月共照人孤狷撫州府志

翁華補

華字持甫崇安人績孫淳熙二年進士知茶

陵州武陵縣

龍爪石

香開巖桂露淒清翠鎖晴嵐潑眼明風度南枝鳥鵲

轉月斜西塢玉繩橫來游十里水雲窟償我一生邱

壑情詩句乞君高挂壁且容鼻息撼雷鳴福州府志

陳經補

經字叔綸龍溪人
宣熙二年進士
倅循州知
欽州封州工詩文著有德齋文集

句

丈夫當廟食仙人好樓居

龍溪縣志

宋

煜

補

煜字伯華莆田人
宣熙二年提舉廣東市舶
知惠州多善政
惠人德之

題朱明洞

湖流一一抱峰回
面面林巒錦帳開
我品洞天居第
七只應題作小蓬萊

石白洞

清泉一派水潺潺石穴端然一白安洗藥煉丹仙已
去只留蹤迹與人看

黃野人庵

淮南雞犬上雲端底事先生獨世間上界應嫌官府

足不如平地自驂鸞

羅浮山志

陳允升

補

允升閩縣人清熙四年太學釋褐

釣魚臺

羅浮山翠律安有釣魚臺臺居觀東隅此名從何來

昔時爨下童辛勤水與柴歲久功行完豹變山陰龜
一朝採幽澗恍然江海涯篙師艤舟在相與語詠諧
爨童有行計篙師相與偕得魚饋主翁辭去挽不同
傍者躡其蹤扁舟往巖崖始信武陵源有路通塵埃
回視所遺魚化作溝中材古有恒真人事豈欺我哉
太公渭水濱白頭佐□□子陵七里灘清風永可懷
爨人去幾秋魚臺尙崖鬼此名照青史此石封蒼苔
我來筆其事靈迹救沈埋山中勝事多對此空徘徊

羅浮山志

劉 駉 補

裊字伯寵崇安人淳熙五年進士至朝請郎
知西全州自號梅山老人有梅山詩集

題小槩

去日春蠶吐素絲歸時秋菊剝金衣沙鷗不入鴛鴻
侶依舊滄浪遠釣磯

詩人王屑云伯寵武夷文士嘗宦于朝以臺
評而歸有句云云怨而不怒之辭也

陳
燧補

燧字日華福州人淳熙五年爲淳安令時詔
府州舉行義役燧集大姓于庭多方諭之眾
皆聽命

我愛涪安好

我愛涪安好溪山壯縣居錦文光璀璨雉羽勢輕徐
比屋興弦誦多田力耨鋤廓然無一事林下自詩書

涪安
縣志

陳宋輔 補

宋輔字公弼甯德人淳熙五年進士官彬州
教授有文名

羅隱題詩石

詩名鼎鼎號三羅藜杖經從石上過鐵畫銀鈎難辨
認雨霖日炙莫鐫磨幽泉添硯潺湲響明月生波感

慨多小立西風吹鬢髮碧蘿深處聽漁歌

甯德縣志

熊以甯

補

以甯號東齋建安人淳熙五年進士官光澤

主簿

題朱晦菴先生古樟書院壁

楊柳陰陰一徑苔先生曾是手親栽幾年杖履追隨

樂今日翻成夢裏來

截江網

壽史滄洲

梯旻一何高其勢如龍蟠下直湖萬頃襟抱滄洲灣
潭居占其勝縹緲雲濤間海邦形勢地秀偉此爲尊

諸湖如附庸有水俱來環元氣昔孕此停蓄固有存
挺生賢哲人象服仍貂冠道大久乃見景好人亦閑
堂堂八座貴袖手樂其天龍飛御宸極廊廡須公還
湖山雖爾佳政恐思謝安下客有侯喜素仰斗與山
搆衣荷延納不棄蒯與菅憐我塵土姿欲使餌金丹
祇愧坐斤骨蛻形良獨難恭惟我公賢崔嵬不可攀
茲遇垂弧且競賦崧高篇南極正耿耿三台輝紫垣
趣起對鈞秉永輔基圖綿截江網

鄧林補

林字楚材一字性之自號四清社友福清人

年十五卽以詩義魁鄉校清熙中登進士

宋百家詩存小傳云一時名公卿如周益公陳止齋晦庵朱子呂東萊俱引為交游嘗伏闕三上書陳時事得失朝議欲授以中都幹官或曰鄧林若在中都此謗議之府也遂授石城丞其詩有皇芬曲一卷共五十篇清祐時大山蕭山則序云詩世業乃精有舜叔卽有性之舜叔工詩如柳煙鶯曉障杏露蝶春糧桃葉渡江狂子敬梨花帶雨澹真如皆奇性之蓋出此性之舜叔子也

玉兒

金蓮花上俞尼子永壽神仙羅繡綺苑中荊荻市令嚴玉像支離瓦官寺六宮鴨劑起淫風太白便應懸姐已此身肯許兜鍪夫猛為東昏拚一死到今羞殺

賣降人去作練兒梁姓臣

曲江歸舟

只道篷低礙覓詩眼前物色自多奇
千山赭去如秦樣一水清來似晉時
漁父豈無緣輩樵人恐有負
苓師僮奴忽報梅花動春在江頭最北枝

賦江郊漁弋

占斷江山是一家寄情漁弋當生涯
青楓翠竹春屏葉白藕紅菱曉鏡花
鴻鵠鷓鴣鵬鷗鷓鴣鱒鮒鯨鯉
鱈鱉河陽書到君當起弩發千鈞釣五車

送衡山琴畫張道士

滿天風月澹蕭寥三尺孤桐古調高不敢問君聽別
操請彈二十五離騷以上皇
琴曲

孫汝勉補

汝勉字堂夫甯德人清熙七年特奏名官監
鎮

白鶴山

梵宇深深小逕回兩崖如峭立崔嵬直疑隱客曾吹
裂或是山林為劈開林靜煙空時透日溪喧石老牛
侵苔涼生佛骨雲生鉢閣住紅塵不入來甯德
縣志

傅誠

誠字至叔仙游人嘗從朱文公游淳熙八年
第進士調永春尉從侍郎黃艾參政使北張
巖開督府于京口奏辟幕僚著述皆出其手
遷太常博士子彥卿能文以疾卒誠哭之過
哀輪對閭卒于殿下

妙庭觀

在富陽縣董雙成故宅

會宴瑤池阿母家九霞光繞翠瓊車坐中一曲山香

舞帽上看看有落花

杭州府志

彭九萬

九萬字好古崇安人淳熙間國學立禮齋長

浚波辭

歲芳兮婉冉悲江空兮蘭柂歸人嬋媛兮胡來遲憺
風魂兮佩誰思素衣兮儼黃裏玉襦兮蒙翠被明波
浮滄兮渺愁予含香懷春兮中心苦昔遺襟兮今契
闊佇佳期兮宵修絕幻塵緣兮蹇中憂時旣晏兮不
可留汎雲輶兮水裔紉予瑟兮難理人奚歸兮路蒼
茫湘有臯兮春綠起萬姓統譜

趙庚補

庚字叔初晉江人淳熙八年進士

句

腰金不足為公重懷寶無瑕乃席珍

泉州府志云歷廣西常平幹官帥蔡戡除次對庚以詩賀之云云戡感其言乞祠歸後客五羊廖槎溪為帥尤加敬焉及卒貧甚門人黃以甯葬之

劉

渠補

渠字仲則莆田人淳熙八年進士官至工部

尚書兼實錄院修撰諡文肅

宋詩紀事補遺小傳云初為岷縣令以政最當進京秩時韓侂胄禁偽學力乞通判漳州而去朱子聞之日仲則辭內而就外不可及也嘉泰元年召除著作郎累擢侍御史兼侍讀奏乞彭龜年首論侂胄之姦居位盡忠乞賜美諡復乞增羅本張饑疫罷四川魚水錢致仕築堂于西郭廬山匾日友于未幾卒諡文肅著有劉尚書集劉克莊為之序

鳳凰臺

鳳臺何亭亭迴與雨華對憑高一登眺秋事渺無際
鷺洲賞心前牛首秦淮外萬疊雲稼橫百纜風檣會
睠言簿書隙載酒邀華旃翰林詩百篇生公法三昧
皮膚雖不似妙趣總相類懷古睇平蕪可但高李輩
憶昔耿與韓造膝陳大計高光課厥成一語不相戾
江淮今清晏河路尙腥穢蛇豕相噬吞天已厭戎裔
箕歛民不堪惡稔將自斃憤激聞雞舞慷慨中流誓
尺捶仗皇靈喋血笞其背燕然彼有石深刻詔來世
兵強在食足萬竈餘廩層叶奏鄼侯功接武文石陛

景定建
康志

傅誠

誠字友叔仙遊人淳熙十一年登進士第官
淮西漕遷司封郎中使金

使金

霜明玉節映寒流馬渡蘆溝向上頭萬里河山觀古
塞百年荆棘嘆神州要臨瀚海銘燕石莫上新亭作
楚囚多少遺民思舊俗可憐金帛歲包羞

東京道上口占

宮闕峩嶷俯碧空九門未曉月朦朧馬嘶南陌東風

遠回首神京一夢中

陳楠老補

楠老福州人淳熙十一年特奏名

萬竹菴

青山迴望合萬竹淨娟娟寶殿晴光冷瑤堦翠色妍
龍吟明月夜鶴舞早秋天坐聽涼風發軒櫺響澗泉

建甯府志

石應孫補

應孫晉江人貫儀徵大昌子淳熙十一年進

士

遊黃山

山川形勝雄江東九華輝映天都峰傳聞早已盪胷
臆恨不插翼長相從竭來隨牒官秋浦城郭犇馳厭
塵土挈家捧檄過臨城偷閒兩作煙霞主黃山登覽
原無由何期易地太平遊清池軒豁日舒麗突兀樓
觀撐深幽憑高徙倚做心目絕壁半天橫碧玉迴溪
千里指顧間螺髻分明三十六壯懷高向紫霄懸俯
視培塿真一拳古今秀色餐不盡筆端收拾生雲煙
萍蹤倘未逐流水古刹相望二三里暇時風月得交

游鷗鷺同眠勿驚起

黃山志

水簾洞

珠簾巧費水晶裁萬古垂垂濺碧苔幾度月鈎鈎不

上孤雲難入此中來

以上黃山志

周

牧

補

牧字善叔甯德人清熙十一年進士累官直
徽猷閣廣西經略使知橫州

超覽亭

翠微深處著亭臺抖擻紅塵雙眼開嵐影剩添杯色
好泉聲不帶市喧來竹間啼鳥破山寂天際孤舟界

浪回占斷鶴峰無限景何如杖履日徘徊

甯德志

廖行之

補

行之字天民其先延平人五代時徙于衢州
淳熙甲辰進士官岳州巴陵尉改甯鄉主簿
著有省齋集

向氏歸來園

十畝江頭地今時靖節園
輞川慚畫古綠野漫名存
自有菊成徑何須花滿園
是間無俗物不用閉松門

送春

煮醞青梅且共嘗
遊蜂舞蝶爲誰忙
鞦韆綵索迷青草
車馬紅橋鎖綠楊
春事戰回蒲劍老
詩腸結盡柳

絲長韶光賦別休匆遽擬伫東風更一觴

和羅舜舉

岸岸花飛客思濃拍空煙水與天東暮雲橫嶺依依
碧朝日翻波袞袞紅鷗共忘機元自適鼉猶鳴鼓定
誰攻凭欄萬里危樓望愁絕江南一笛風
對酒憐鵝滿意黃江天風暖水紋香詩情到底能多
助官事出來未苦忙晴雨不妨春自好醉醒何擇我
非狂幾時容與扁舟去浩蕩煙波情興長

徐夢發

補

夢發浦城人登進士第淳熙十二年以宣教

郎知甯德縣政多平恕累官廣東招捕使元
兵下江南死之

超覽亭

壬子歲一月亭成始宴賓扁題原用舊輪奐喜更新
遠眺江逾碧靜觀山自春亭邊泉更好一洗簿書塵

甯德

志

陳紀補

紀字仲禮甯德人淳熙十四年特奏強敏有
大志試冑監呂東萊擢置首選李景和使北
辟紀偕行歷知邵陽縣柳州藤州英州三郡

皆有政蹟

展旗峰

寰中孤突接微茫秀向西來萃一鄉三邑根盤龍起
伏二儀氣結鳳騰翔影橫月窟煙霞古勢逼星河雨
露香今古鍾靈原有自兆呈勳績著旗常

甯德志

陳直卿

補

直卿晉江人樸子淳熙時知江西新昌縣累
官知英德府

垂虹亭

西望洞庭突兀東連仙里人家笑指闌干三百醉來

就此乘槎

吳都文粹續集

張斗南

補

斗南字唐英號釣浦羅源人淳熙丁未進士

後召對官兵部郎中

題逆旅詩

辭得官來性又便恰如病馬解韁牽雖無白日三聲

啾嬴得清宵一枕眠

羅源縣志

劉季裴

補

季裴字少度福安人孝宗朝終祕閣修撰

壽朱守

康鼎談經世少雙一時文物動虞庠江湖雖隔金閨
籍衣袖仍聞玉案香墨客幾年陪畫隼板輿平日到
護堂時清身健堪行樂未見荆榛老鳳凰

聖宋名臣
獻壽集

王 亘

亘字伯通福州人淳熙間知南恩州

十洲圖

山川如幻閣長秋一島飛來伴九洲不礙漁樵雙槩
過何妨羅綺四時遊雲疑泰華分張去水憶蓬瀛散
漫浮禁苑未知湖海樂生綃寫取獻中州

延祐四
明志

次胡澹菴題挹翠軒韻

西山排闥來周遭自環翠俗眼少見之一覽忘世味
平生三徑心盍早賦歸計從落塵土居不與草木儻
公餘事幽尋清風拂衣袂最喜軒中人所挹多爽氣
蓬蒿天地寬萬境發詩思白雲未能閒時出過窗几
簷花聽夜雨池草生春媚山靈若相知好風爲裂眚
餘光雖力挽回次那得致

肇慶府志

游次公

補

次公字子明建安人號西池定夫諸孫禮部
侍郎操之子范石湖帥桂林日參內幕有唱

酬詩卷

漁父

竹裏茅茨竹外溪
鄰鄰白石護漁磯
想應日日來垂釣
石上蓑衣不帶歸

詩人玉屑

畫虎圖

平生射虎裴將軍
馬猶如龍弓百鈞
手撚白羽旁無人
注虎使虎不敢奔
須臾叢薄爛斑出
人馬不知俱辟易
矢如蓬蒿弓減力
將軍得歸幾敗績
徐行爪牙無不露
眈眈垂頭若微顧
尾翦霜風林葉飛
倏忽山頭日光暮
包家畫出真於菟
我尙不敢編其鬚
昔人作詩譏畫圖
吁嗟畫圖今亦無

合璧事類別集

李安期

補

安期字泰伯邵武人以詩游江湖間一日謁
四川茶馬使王淮淮將以賢良薦因奕爭道
遂拂衣而去

賦白鷺

漁父家風不設罾錦鱗爲飯水爲羹銀袍祇當蓑衣

著自在江湖過一生

邵武府志

王佐才

補

佐才字呂輔崇安人少游邑庠范汝爲叛總
義兵禦賊建陽以功補承信郎後爲吉州水

軍統領與賊魁殊死戰中流舟壞而沒吉人
廟祀之

答秦兵部求墨竹

夜到茅亭近竹籬影隨寒月下苔墀吟餘未懶蕭疎
與會寫離披一兩枝

贈徐子虛畫魚

我嘗放意游江湖喜從釣叟觀真魚有時臨溪行復
坐秋水無風魚自如鮮鱗滑鬣隨上下回旋戲躍形
皆殊兩兩相逢若對語聚頭戢戢搖雙鬚忽然散漫
皆游去一半掉尾潛菰蒲往來得所弄晴色員波觸

動生浮珠困依垂楊看不足盡日忘歸誰與俱自從
北走塵土窟十年不復瞻尊鱸憑誰畫出江湖趣東
海今聞徐子虛毫端奪得生時意京師好事爭傳摹
寫成雙幅輒遺我展舒活動驚堂隅窮搜前古少奇
筆此本祗恐人間無任教涸轍強濡沫對面相忘千
里書

以上聲
畫集

游 開補

開字子蒙建安人定夫從孫

和劉叔通

昨夜劉郎叩角歌朔雲寒雪滿山阿文章無用乃如

此富貴不來爭奈何
邴鄭向嘗依北海
晁張今復事
東坡吹噓合有飛騰便
未用溪頭買釣蓑

朱子語類云詩須不費力方好此等詩使蘇黃見之定當賞音

周明作補

明作字居晦建陽人宣教郎朱子弟子

龍巖山

靈河直欲貫蒼崖
神力摩抄石島開
冰玉滿懷雲滿

袂分明天上泛槎來

廣西通志

陳子常補

子常字常翁仙遊人著有周禮解

井田封建圖

爲成者十復爲終終十還爲百里同祇爲諸儒泥方
法不知起數總皆縱

全閩詩話云子常精於周典如井田封建先
儒所未發明者悉畫爲圖有詩云云

趙希融補

希融長樂人太祖九世孫

賦玉巖

君不見陶令門前栽五柳聊爲折腰辭五斗歸來三
徑足歡娛琴書得趣人誰有又不見和靖卜築臨西
湖湖山勝景天下無至今疏影橫斜句人與梅花共

清癯古來逸士皆如此一節純全能終始三歎古風
挽莫回幸有玉巖人足比二十餘年養浩深厭居朝
市入山林此身出處無非道憂世誰知一寸心愧予
朱墨塵埃裏恨不巖前濯清泚想象入室芝蘭馨有
口清廟遺音美聞說當年贈監書蒲公之見特其粗
要知命義吾儒事願學同遊周邵蘇

宋詩拾遺

陳嘉言

補

嘉言晉江人紹熙元年特奏名

蔣洋道中望太姥山

望裏仙踪渺煙霞滄海東逕迷丹竈外人轉大還中

虬偃千林日鸞吹一夕風停驂遲太姥藍水洗塵容
絕巘雲霄外嵯峨杳靄間雲將山岫溼鶴伴月華閒
流水溪溪靜琪花樹樹殷攀躋猶未得清夢遶禪關

福甯府志

案陳嘉言已見宋詩紀事有題太姥墓詩與此嘉言當是一人但紀事以為候官人咸淳未築室台嶼云云而此嘉言福甯府志則云晉江人紹熙元年特奏名紹熙元年至咸淳未已八十餘年未能遽斷其為一人今兩出之以俟再考

閩詩錄丙集卷十終

閩詩錄丙集卷十一

侯官鄭杰原齋

侯官陳衍補訂

康鼎成

鼎成字未詳莆田人紹熙元年特奏名知潭州事

九鯉湖

久學秦人避空聞漢主求丹爐無鳳髓石室有龍湫
谷挾千峰雨湖生六月秋塵蹤應自息長嘯下溪鷗

陳機補

機字介行晉江人兄朴紹熙元年進士機學
問該貫尤長於詩寫情咏物若不經思往往
出人意表

達里庵

抖擻塵埃上翠微石泉佳處掩柴扉道人
不識人間事啼鳥聲中看落暉

永春
州志

句

從此不除窗外草要觀天地發生心

讀

易須信生生是

真意疎籬依舊竹生孫

泉州
府志

黃瑄補

瑄字漢珍羅源人紹熙庚戌進士官衡州通

判

省墓詩

長因風木起悲酸省墓歸來痛忍言雖得青衫聯子
貴深慚白髮負親恩璜溪猶有家居舊蕭寺尋來手

澤存墨迹依然逾二紀摩娑塵壁黯銷魂

羅源縣志

黃治補

治莆田人紹熙元年進士人稱岳陽先生

句

威稜赤壁千尋峻德量黃陂萬頃寬

上黃州太守輿地紀勝

林伯春 補

伯春晉江人紹熙元年進士

藍溪

羊腸路入最高峰倦倚東風點瘦筇芳草有情春意
遠青山依舊暮雲重新來梵閣添奇觀前度詩人帶
老容寄我此身天地裏夢回林杪一聲鐘泉州府志

余復 補

復字子叔甯德人紹熙元年進士第一甯宗
即位充實錄院檢討官著有禮經類說左氏

纂類詩文集

和御賜登第

風虎雲龍豈偶然
信知盛世士多賢
虞庠教育蒙深澤
漢殿咨詢愧首延
釋褐遽沾瓊宴寵
錫詩齊聽玉音
宣愛君憂國平生志
敢負周王宴樂篇

林

崑補

崑字仲山古田人
紹熙元年特奏名
嘉泰間知金州
修復清湘書院
與魏了翁友善
爲之作記在郡九年多惠政

青田巖

老鶴回翔去幾年
至今巖壑此名傳
攀躋分寸疑無

路飛入方壺卻有天白象綠獅呈怪石神泉深洞隱
真仙細看滴乳流脂處不是青田是玉田

廣西通志

張本中

補

本中字傳正長樂人紹熙初知陽山縣

賢令山

□□縈紆一徑深□看石壁起千音雨□□□來春
溜霧靄留空□晝陰坐對雲山開遠眼靜諧泉石會
幽吟山陰東武定何□妙趣何曾聞古今

廣東通志

徐璣

璣字文淵一字致中號靈淵晉江人後移永

嘉紹熙間官長泰知縣有泉山集二薇亭集
宋詩鈔小傳云初唐詩廢久璣與其友徐照
翁卷趙師秀議昔人以浮聲切響單字隻句
計巧拙蓋風雅之至精也近世乃連篇累牘
汗漫而無禁豈能名家哉四人之語遂極其
工而唐詩由是復行矣

漳州別王仲言

百草各有種春至不栽培交情重故知豈論才不才
相識十年初再見天之涯共飲一杯酒榮若紅顏開
人生有此樂知復能幾回契濶幾已深矧爾病與衰
朔風從何來吹發枝上梅天寒日欲莫又乃行色催
君去江水西我歸近天台東西道路長未可心瞽摧

明朝碧雲多
仁思良徘徊

述夢寄趙靈秀

江水何滔滔
渡江相別離
揖子家舍前
對子衣披披
問子何所爲
旅舍未得歸
執手一悲歎
驚覺妻與兒
起坐不得省
清風在簾帷
平明出南門
將以語所知
過子舊家處
寒花出疎籬
蕭蕭黃葉多
裊裊歸步遲
子去不早還
何以慰我思

投楊誠齋

名高身又貴
自在小村深
清得門如水
貧惟帶有金
養生非藥餌
常語是規箴
四海爲儒者
相逢問信音

黃碧

黃碧平沙岸陂塘柳色春水清知酒好山瘦識民貧
雞犬田家靜桑麻歲事新相逢行路客半是永嘉人
憑高

憑高散幽策綠草滿春陂楚野無林木湘山似水波
客懷隨地改詩思出門多尙有溪西寺斜陽未得過
初夏游謝公巖

欲取紗衣換天晴起細風清陰花落後長日鳥啼中
水國乘舟樂巖扉有徑通州人多到此猶自憶髯公
孤坐呈客

晨起猶孤坐，餅泉待煮茶。寒煙添竹色，疎雪亂梅花。
獨喜忘時事，誰知改歲華。多君能過此，人里似仙家。

題薛景石瓜廬

近舍新爲圃，澆鋤及晚涼。因看瓜蔓吐，識得道心長。
隔沼嘉蔬潔，侵畦異草香。小舟應買在，門外是漁鄉。

書翁卷詩集後

五字極難精，知君合有名。磨礨雙髯改，收拾一編成。
泉落秋巖潔，花開野徑清。漸多來學者，體法似玄英。

大龍湫

瀑水數千尺，何曾貼石流。還疑衆山折，故使半空浮。

霧雨初相亂，波濤忽自由。
道場從建後，龍去任人遊。
秋夕懷趙師秀

冷落生愁思，衰懷得句稀。
如何秋夜雨，不念故人歸。
蛩響砌尤靜，雲疎月尚微。
惟憐籬下菊，漸漸可相依。

冬日書懷

門庭黃葉滿，園樹盡玲瓏。
寒水終朝碧，雲天向晚紅。
蔬餐如野寺，茅舍近溪翁。
非是分羣寂，出來趣不同。
西征有懷翁趙徐三友

窮冬逆旅身，薄宦此艱辛。
渡水添愁思，看山憶故人。
煙生村落晚，雨過竹松新。
昨夜還鄉夢，逢君苦未真。

湘水

湘水幾千里平流少激湍數家分市井列石起峰巒
豈是昔曾到猶疑畫上看吟詩身漸老向此作微官

泊舟呈靈暉

泊舟風又起繫纜野桐林月在楚天碧春來湘水深
官貧思近闕地遠動愁心所喜同舟者清羸亦好吟

春日遊張提舉園池

西野芳菲路春風正可尋山城依曲渚古渡入修林
長日多飛絮遊人愛綠陰晚來歌吹起惟覺畫堂深

寄趙端行

庭深自無暑苔徑復縈紆賓客不長到兒童亦可娛
荷花時帶粉蒲葉曉凝珠與爾城闔隔茲歎想不殊
登信州靈山閣跨鶴臺

清遊吾有分渾似昔曾來野屋憑高住青山到水回
欲看靈岫遠須待曉雲開漸漸生愁思鄉心上古臺

檄途寄翁靈秀

聞道長溪令相留一館閒便令全近舍尙隔幾重山
爲旅春郊外懷人夜雨間年年疎覽鏡怕見減朱顏
登黃碧軒繼趙昌甫作

步陟高高寺徐行不用扶春天晴又雨山色有還無

句向閒中覓茶因醉後呼所懷論未足何乃又征途
吾廬

蓬戶閉還開深居稱不才移荷憐故土買石帶新苔
藥信仙方服衣從古樣裁本無官可棄何用賦歸來

題東山道院

古院欽欽石作層綠苔芳草近郊坳溪流偶到門前
合山色偏來竹裏青靜共黃蜂通戶牖閒將白鳥共
沙汀道人亦有能琴者一曲清徽最可聽

六月歸途

星明殘照數峰晴夜靜惟聞水有聲六月行人須早

起一天涼露濕衣輕宦情每向途中薄詩句多於馬上成故里諸公應念我稻花香裏計歸程

贈趙師秀

薄宦歸來隔幾春清羸還是舊時身養成心性方能靜化得妻兒不說貧竹長新陰深似洞梅添怪相老於人亦知曾見高人了近作文章氣力勻

贈徐照

近參圓覺境如何月冷高空影在波身健卻緣餐飯少詩清都爲飲茶多塵居亦似山中靜夜夢俱無世慮魔昨日曾知到門外因隨鶴步踏青莎

泊馬公嶺

維舟拂曉步平莎
晚泊雲根第一家
新取菜蔬沾野露
旋編籬落帶山花
門前相對青峰小
屋後流來白水斜
可愛山翁無一事
藤墻西畔看蜂衙

秋行

紅葉枯梨一兩株
儵然秋思滿山居
詩懷自嘆多塵土
不似秋來木葉疎

丹青閣

翠靄空霏忽有無
筆端誰着此工夫
溪山本被人圖畫
卻道溪山是畫圖

移官南浦

簿領初爲建水棲移官南浦又沈迷溪山轉處人煙
隔惟有黃鸝一樣啼

春晚

午風庭院綠成衣春色方濃又欲歸
蛸蛸散邊荷葉

出醪醖香裏柳綿飛

以上二
薇亭集

袁聘儒

補

聘儒字席之建安人歸安籍葉水心門人紹

熙四年進士著有述釋水心易說一卷官至

浙東安撫使

三高祠

功成但可將身去逃難安貧適所遭三子有靈應共

笑一時何意故為高

續吳都文粹

趙必漣

補

必漣字仲連崇安人太宗十世孫有倚梅吟

稿

濯足

小橋坐濯足澗狹水流急源頭夜雨多落花濛紅溼

崇安縣志

趙必曄

補

必暉字伯暉晉江人漢安懿王八世孫從益
王至永嘉蒲壽庚作亂將殺必暉參軍吳伯
厚以計出之遂居泉之東陵

和榴皮題壁韻

四仙吸露餐霞者卻勝人間煙火餘二十八言留壁
上不須青鳥爲傳書

東林山志

鄒應龍

補

應龍字景初泰甯人慶元元年進士第一理
宗朝累官端明殿學士簽書樞密院事知慶
元府兼沿海制置使

遊寶蓋巖

夙有斯巖約今朝喜踐盟路從支澗入人在半空行

六月如霜候四時長雨聲願求容膝地著我過浮生

邵武府志

姚

東

補

東字明仲龍溪人慶元二年進士授長溪簿

嘗大旱禱雨民稱爲主簿雨令丞廨被火獨

簿廨存人以爲誠愛所格再調保昌丞後以

通直郎致仕

皆山西爽二亭

華亭百尺跨嶙峋照眼風光自吐吞
閒數炊煙分聚落坐收奇觀入壺尊
岡巒繞戶雲生袂鏡拆無聲月在軒
更有何人佩黃犢耕鋤已徧落霞村

龍巖州志

趙彥假補

彥假字顯父魏王七世孫居閩慶元二年進士

翠蛟亭和鞏栗齋韻

天下名洞天有山必有水餘杭山水窟神仙所棲止
仙人乘雲去玉蛟留潭底至今雷雨夕蛟睡時驚起
爪劈巖石裂石罅滴乳髓涓涓泉流出半垂白鳳尾

風來琴筑響月照纓絡侈曲折納深池徹底清且泚
築亭當澗衝木石相表裏翠壁潤含煙層峰去天咫
道人幻出奇指顧猶未已忽驅蛟走鬪瞬息八百里
怒氣挾奔霆草木爲披靡兒童驚震掉面若槁灰死
達人本大觀談笑自隱几須臾羣動息靜坐窮物理
水石本無心相激一至此

洞霄詩集

連三益

補

三益字叔友安溪人傅伯成奇之妻以女慶
元二年進士知沙縣爲政明簡庭無留訟倅
廣州再倅紹興未上卒

蓬萊山

蓬萊一境最奇哉門外坑流傍石隈巨竹不知何日

裂喬松總是昔年栽石移莫匪神功運巖築更無山

鬼來料得眾僧行道處天花馥郁遍蒼苔

泉州府志

黃夢攸

補

夢攸字伯荀福安人慶元二年進士從議郎

池州計議官處事端飭民便之

獅子巖

蛟龍躍獅子吼頭角崢嶸精神抖若問破天荒還我

霹靂手

福甯府志

邱和補

和字國瑞崇安人登慶元二年進士調光澤簿後解綬歸隱

寄從弟善

海上扶桑散曉暉荷衣共喜換蓑衣浮雲天外弄濃

淡好趁輕陰未雨歸

崇安縣志

葉發補

發字定叔閩縣人慶元二年進士奉議郎

麻姑巖

怪石倚空碧傳有神仙迹元放古來遊孝先舊曾歷

山前無斷碑往事杳難覓麻姑去不來青鳥無消息
天台續集

龔日章補

日章莆田人慶元二年惠州教授歷江東安

撫使屬官

贈水簾洞黃秀才

攀蘿訪山扉極目窮海表峰疑廬山高巖若盤谷杳
藥臼歷窮凹石樓迫天小水簾雲頂飛丹葉天涯渺
古峒匝蝴蝶閑庭喧百鳥誦聲雜石溜炊煙出林杪
藜燭雖未輝翠屏自環繞內樂屏紛華天機茂膠擾

鹽鹽比膏梁所得孰多少會須攜竹爐一鳴聽雞曉

詹師文補

師文字叔簡崇安人以詞賦鳴于時慶元丙

辰進士調婺源尉有捕盜功調江西憲司檢

法治獄皆得其平秩滿歸隱著有通典編要

幔亭遺稿

泛舟

九曲煙霞景若何移舟曲曲泛清波丹峰絕頂籠花

木碧洞當門挂薜蘿仙逕鶴翻松露下古潭龍蟄水

雲多紫陽去後閒風月獨向平林倚櫂歌

武夷山志

李

呂補

呂字濱老一字東老光澤人年四十卽棄科
舉慶元四年年七十七卒著有澹軒集十五

卷

陪晦翁游玉澗

夜琴響空山臨流水方折老仙何處來欣賞共清絕
不知盧仝家還有許風月

送高丞別

名衡夫
字平叔

君侯七閩英學問早有餘年時猶未冠鼓篋游上都
文成筆五色四海仰名譽調丞尉江邑有實不願圖

搗來對二松青襟映冰壺粹然眉睫間未變庠序儒
胸中浩然氣固已雄萬夫我窮卧洲渚江鷗以爲徒
屢枉高軒過峩冠講唐虞馳騁文史樂時得陪卷舒
瓜代遽及期此情將焉如恥作兒女態揮淚沾衣裾
虎溪豈限我足創方趨趨悵望不遠送搔首空躊躇
所覲善行李早達三山隅安居未容久快作朝省趨
用賢世所急君才應時需願補仲山袞再矢臯陶謨
勿以得失慮行當翺天衢愧乏折筮贈短篇見區區
他時舊交念濶闊寄樵漁

和許尉仙田舍野老有可憐之態壁間之什

乞糶民宵征出糶官夙駕艱食間填壑災星未退舍
七閩況多山厥田惟中下年登穀粟賤逐末貪白話
一逢歲不稔大半爲饑者公私久匱乏誰歟可資藉
哀哉南畝農長年服耕稼傾困了租賦僅逃吏胥罵
東作已無糧貪賒甯論價負逋罄產償求售忘早夜
逡巡生計盡失所安足訝尉仙明達人出語補風化
咄彼兼井家歛衽當愧謝

癸丑季春上洲頽岸出敗冢冢中有塶云元嘉
二十二年七月二十六日余功曹冢後世子
孫長興富貴宜賒因題數句

八百年前窆功曹身姓余元嘉兩行字敗璧八分書

富貴念猶在子孫今已無癡人不修省視此意何如

以上見
澹軒集

雲際嶺

凌空石磴三千丈匝地瑤林百萬花自有眼來方見
此直疑身已到仙家

全閩詩話云雲際嶺北溪水出焉宋李呂有
詩云云

真德秀

德秀字景元一字希元浦城人慶元五年進

士授南劍州判官嘉定初遷博士紹定中拜

參知政事進資政殿直學士有西山集

鶴林玉露云真西山帥長沙郡人爲立生祠
一夕有大書一詩于壁間云舉世知公不愛
名湘人若欲置丹青西天又出一活佛南極
添成兩壽星幾百年方鍾間氣八千春願祝
修齡不須更作生祠記四海蒼生口是銘
閩中錄云西山自泰定至端平上下三十餘
年凡朝廷有非舉必疲精竭惴惴爭諫上聽而
止及出知泉州迎者塞道政平訟理囹圄一
空蕃舶聞風而至知潭州以廉仁公勤四字
勵僚屬以學術淵源勉多士立惠民慈幼社
倉以利民皆本誠正修齊以推及也夫自侂
胄立僞學之名以錮善類凡近世大儒之書
皆被禁絕先生晚出獨慨然以斯文自任講
習而服行之黨禁既開正學遂明于天下後
世多公之力也著有大學衍義文章正宗經
筵講義詩文稿卒諡文忠學者稱西山先生

送裘司直得請西歸

輕舸龍山頭木蘭作雙櫓飄然裘司直乘向南昌去
問君鵷鸞中脫身遽如許棲遲三十年始得官掌故
小須上上考豈不登省戶自言野心性眯目九衢霧
修竹歲云晚萱草秋亦暮噉噉投林鳥猶得反其哺
江西父母邦非復昔饒裕蠻煙一腥穢樂歲且狼顧
遺黎空杼軸行旅窘刀布天門窈萬里可望不可溯
君今佐元帥安危繫一路瘡痍俟滌濯畫諾歸飲助
先聲姦人惴高節懦夫慕邁當再前席一正天子度
白鷗沒浩蕩蒼鶻在指呼我亦南陔人扁舟從此具

題八君子圖後

劉子出江西訪我江之東何人與偕來銜袖八鉅公
韓歐開濟姿如晴月生空潞公山嶽重文正霜檜同
玉立者坡仙天游匪涪翁一朝參我前毛髮生清風
婁其趙韓玉小異凌煙中半山執拗面亦得傳無窮
趙中令像與今原廟
侑食本不同故云

長沙新第呈諸學士

莫清彼瀟江莫峻彼衡嶽澄光挾秀氣日夜相回薄
月吸珠含胎虹貫玉生璞子方有苗裔溫然粹而懿
一童與三何雙鳳兩鸞鶯奮身辭草萊正論吐諤諤
彤庭拜恩歸天香尙盈握良才國之寶一見我心樂

平生功名會萬里初著腳永肩致主念更勉經世學
錙銖分義利毫縷辨純駁相期激清風與俗洗氛濁
誰歟指其南是邦有先覺

送林自知自幕中歸常甯

始吾與林子周旋大江東子方清且貧簞瓢屢云空
勁氣凜不折耿耿如長虹明年擢高科對策大明宮
一尉遲五年出入無奴僮再見湘水濱凜凜復昔同
招徠元戎幕汎綠依芙蓉小夫敢相吏故人儻相從
云胡歲未竟決去如霜鴻挽之不可留聊復少從容
老我慵且鈍栽培欠深功子進未可量德業方崇崇

永懷昔君子和氣填心胷濂溪霽月朗伊水春風融
至今想其人猶爲起敬恭夫資貴強矯學力無終窮
我如石之頑遲子相磨礪子質雖玉瑩可廢宅山攻
雁峰毋久留來思靈麓峰

司理弟之官岳陽相別于定王臺悽然有感爲

賦五詩以餞其行

錄四

定王百尺臺長安萬里目昔人思親心山川詎能局
於焉共登臨使我增感觸微霜隕咳蘭悲風撼庭木
銀山在何許白雲但空谷搔首重裴回冥冥江樹綠
念昔戲綵時歡娛共晨夕天風吹驚鴻一散不並翼

相逢重湖南感歎復悽惻王事不可留去指重湖北
層樓時悵望茫茫楚天碧數寄平安書老懷庶寬釋
憶我將漕年適如子今日於焉四閩餘過眼風雨疾
壯強豈足恃進德當汲汲永懷古之人聞道在四十
我慚已過之因循悼前失子盍猛自鞭聖門本無柅
先民不可見懷哉金玉音士雖一命微愛物宜存心
矧茲園扉內白日變重陰求情筆楚下寃哉詎能禁
諱嗥漫弗省鬼神爲悲吟子往蒞其職朝夕惟欽欽
謹刑勿留獄斯語真良箴

送吳定夫西歸

吾衰倦對客晤語惟青山修竹引清風時爲掩柴關
今晨何人來蹋破莓苔斑驚顧復自喜不妨伴虛閑
世情重聲利榮塗足趨走夫君獨何爲經年闖林藪
東尋金壇翁南訪玉峰叟借問兩臞仙來時輕健否
慈門者仙伯乘雲賓帝鄉念之每汎瀾風味不可忘
其門多英特清文照縑緗爲我勗諸賢佐道當自強
君橐中有趙元道袁廣微錢
子是陳和仲諸君之文故云
麻源在何許茫茫白雲端悽其一布裘何以禦風寒
歸來有餘師興盡當知還便好斲空谷臙種青琅玕

送王子文宰邵武

堃

樵川古樂國誰遣生榛菅往事忍復言念之輒長歎
子往字其人寄任良亦艱傷哉周餘民十室九孤鯨
深心察疴瘡摩手蘇瘼癩願加百倍功勿作常時觀
熒熒匣中龍爛爛巖下電紛綸揮霍閒坐子百千變
雖然事幾微易矚亦易眩悞從快處生理向靜中現
健決要安徐聰明貴韜斂潛齋有愚言或可代箴砭
百鍊或繞指粹白俄成緇有初諒非難其難在終之
道心眇絲粟易爲羣物移不有精一功誰能勝惟危
子今如玉雪瑩潔亡少疵願言保令德歲晏以爲期
堂堂先太史一節貫初終况有壽母賢切切唯教忠

承家諒匪易負任邱山崇可不日汲汲仰希前哲蹤
敬義兩夾持師友交磨礪餘事作詩人毋顯餒句工
平時州縣闕上下意苦異善書肘或掣有志奚由遂
子今得所從展布有餘地兩賢夏馱力萬物應吐氣
相期召杜功奕奕照來世不須峴首碑自有樵川志

游鼓山

六月二日偕潛夫叅謀諸友游鼓山飲湧泉
亭明且登天風海濤坐白雲亭追懷昔游愴
然有感偶成拙詩奉呈并簡住山明師

嚴宸有追詔趨上太守符疲民未蘇醒還顧空躊躇

來尋靈源盟喜與佳客俱始酌清冷泉一浣丹墨汗
超然煩溼中著身在水壺遲明陟危亭雲濤渺空虛
煙霏倏開闔峰巒時有無偉哉此絕觀雄壓東南隅
蒼崖萬仞立四面環瓊瑤翠木巧蔽虧亭午清陰敷
令人愴忘歸似到真華胥憶昨汎蓮日選勝邀朋徒
摩挲崖上刻慨仰趙與朱舉觴酌且盟一節期終初
重來三十年恍如隔朝晡並游四五人存者獨老癯
有懷子陳子感嘆爲歛歔子抱明月終我方長涂趨
顛踣懼不免儆省當何如願言祝同社著力相携扶
禪伯亦可人新結峰下廬老我故倦游軒冕非所娛

會須脫塵鞅來依嬾瓊居

題金山

江來朱方注之東海潮怒飛日夕相撞春將古來
義士骨化作在瀾中央屹立之青峰孤根直下二千
尺動影裊窈冲融中黃金側布蘭若地繫翠面面開
窗櫳雙橈伊軋破浪屋恍忽置我高籠縱是時千山
雪新霽水面月出天清空濤聲四起人籟寂毛髮蕭
爽琉璃宮披衣明發躡煙靄尖皆俯入歸飛鴻襟前
渤澥斂暝色袖裏岷峨吹曉風越南燕北但一氣塵
埃野馬何時窮蒼梧虞舜不可叫王事更悵歸匆匆

會長沙十二縣宰作補

從來守令與斯民都是同胞一體親豈有脂膏供爾
祿不思痛癢切吾身此邦祇以唐時古我輩當如漢
吏循今日湘潭一卮酒直須散作滿懷春

蓉塘詩話云西山先生帥潭時作

贈張童子補

聞君早號張童子顧我初非韓退之可惜浪拋洙泗
業祇看風鑑學希夷西山集

敖陶孫補

陶孫字器之號臞翁長樂人慶元五年一作嘉定

一作開禧進士有臞翁集二卷

宋百家詩存小傳云慶元間韓侂胄用事丞相趙汝愚以謫死陶孫作甲寅行以哀之侂胄事敗授通州海門簿教授漳州辟酒所幹官歷奉議郎主管華州西嶽卒年七十四陶孫學問淵奧劉後村極稱之贈詩云老年絳帳聊開講當日烏臺要勘詩蓋指題壁事也其詩雄渾深厚雖至平淺處不易涯淡嘗作詩評自魏歷宋凡二十九家辭意雅確世服其知言

題三元樓壁

左手旋乾右轉坤如何羣小恣流言
狼胡無地居姬旦魚腹終天弔屈原
一死固知公所欠孤忠幸有史
長存九泉若遇韓忠獻休道如今有末孫

四朝聞見錄云慶元初韓侂胄既逐趙忠定
太學諸生敖陶孫賦詩于三元樓云云方書
于樓之木壁壁已不復存陶孫知捕者至急
更行酒者衣持煖酒具下捕者與交臂問敖
上舍在否對以若問太學秀才耶飲方酣陶
孫亟亡命歸走閩後登乙丑第

送林伯農還鹿角山

今我不樂遊四方夙昔已具浮海航十年點化鷗心
性一生正坐虎文章海山未必盡佳處往與蟹子收
漁梁夢中了了說吳楚山川如掌今羊腸讀書南鄰
索檳榔厚頭汗邪豚酒香何時攝衣上公堂蛤蜊含
漿魚尾黃客從南來勤寄將

洗竹簡諸公同賦

舍東修竹密如櫛一日洗淨清風來脫巾解帶坐寒
碧置觴露飲始此迴平林遠靄開圖畫西望羣山如
過馬詩翁意落帆影外孤村結廬對瀟灑百年奇事
笑譚成向來無此蒼龍聲閑身一笑直錢萬剡粉剡
青留姓名

用韻謝竹主人陳元仰

熱中襪襪令我汗日暮佳人期不來陳郎揖人不下
楊青山白雲喚得迴手閒十畝蕭郎畫筒裏何妨繫
我馬食單得涼清可啜毳褐分陰翠如灑搖金戛玉
真天成夢擣風前茶臼聲一川窈窕荷萬柄野翁得

此甘辭名

放船

柳邊放船試南風揚溪荷花飛豔紅一川雲錦步不
盡我舟正在繁香中午天無雲青脈脈枕舷哀歌醉
脫幘更將綠葉穿碧筒欲臣屈原奴太白風前一笑
玉塵橫蜻蜓側翅潛魚驚騎馬貴人多內熱此歡勿
語長安城須臾客醉船亦解信流一抹西村外翁媪
負牆樵牧奔拾薪供茶初不記還家鼻息撼四鄰閩
風接夢疑非真清遊何時記三人臞菴與弟拙鄉陳
四月二十三日始設酒禁試東坡羹一杯其味

甚真覺麩蘖中殊無寸功也食已得三詩

今日忽感悟閉門謝麩生未危卻二豎不戰仇三彭
拊擊北海尊瘳量東坡羹尙恨薄滋味未能免虧成
我欲嚙元和默坐朝上京坐待梨棗熟小試昇天行
評詩要平澹此語吾不然大千自有舌何用長短篇
謂是天送句端正落我前旋聞口吻鳴頗益心腸煎
少陵孰句佳欲以一死捐是中有真意靖節差獨賢
去夏苦多雨勢若無炎官今晨迫重午香黍仍膠去聲
槃天機杳難測人言亦多端祇今原田上立苗未妨
寒但願含穎時借日開迷漫螻蛄爾何知煦煦啼夜

闌

送王郎洽

車輪何由方草色欲無路晴川媚雙燕及此送將去
若人天機深奇服雅自與色溫無可鉅語妙時一吐
相逢大江上爲我浣塵土後期豈前料已作千歲語
告歸何草草雙水深霧雨稍聞父老舊門戶要渠補
祇愁模楷地與世作誇詡甯當去樓梯閑置我叔度
翼翼吳齊門大江流日夜別君雖咫尺卽是風牛馬
君才何如我我拙猶肯借淮人買繡絲布洲市如赭
張皇十日飲著公喬松下畫工亦豈學愛玩此粲者

人情勿苦拒與馬幸整暇向來三宿戀取別萬里駕
想當雙玉瓶酣歌淚盈把縹渺鴻鵠去吾甘老原壘

上閩帥范石湖五首

錄四

人物於今正渺然欲從江表訪先賢邇來耆舊無新
語誰使文章漫兩川利器蚤能誇穎脫偏師聊復制
中權騷人有幾登青竹耐可同時欠執鞭

今代論文更是非賞音誰復得牙夔真從長慶成編
日便到先生晚歲詩萬馬蕭蕭閑律令孤峰隱隱出
旌旗了知長短三千首收拾餘師卽我師

丁年口伐真奇事一代詩鳴不救貧大手欲推潯水

頌羣酋曾折石湖名乃今謝傅還初志其奈王陽是
故人獨有我聞欠公句詔書果起釣磻濱

此行閩嶠吾能數行盡天南未了青莫倚看山韜墨
本要須入界挾圖經西湖楊柳雲生鏡東阜離支錦
作屏欲託翁冰鳥石象請公作屋與新銘

以上隴翁集

西樓

祇有西樓日日登闌干東角每深凭一層已是愁無
奈想見仙人十二層

後村干家詩

曾從龍補

從龍字君錫晉江人公亮四世從孫慶元五

年進士第一累官知樞密院事兼參知政事
卒贈少師

題衢州順溪館

紅照西沈暫解鞍偶然假館豈求安
新豐獨酌誰爲侶坐對窗前竹一竿

娛書堂詩話云曾參預從龍赴省時館于衢之順溪題一絕云云識者已避之矣是年竟至大魁致身政府至今其館扁爲狀元

蘇大璋補

大璋字頤之古田人慶元五年進士官著作

佐郎出知吉州

鳳翀峰

在古田縣五花石

早起聯鑣上翠微
瞰虛歷級步欽欹
昔聞華頂蓮生藕
今見南山菊滿籬
縱眼橫看天地闊
壯懷唯有鬼神知
安期引我丹霄路
十里雲煙特地披

福州府志

鄭

域補

域字中卿號松窗
三山人慶元中曾隨張貴謨使金著燕谷剽聞二卷官幹辦行在諸軍

糧料院

山丹

團欒絳蘂發枝閒
鉛鼎成丹七返還
乞與幽人伴幽

壑不妨相對兩朱顏

全芳
備祖

黃楊巖

暮秋訪幽隱謝屐凌崩空行到山根門還與平地同
舉手抉層雲下視無高峰疎藤挂赤蚪枯苔糝青茸
回首三神山縹渺滄海東指點笑語高吹聲半天中
安得大鵬背載我遊無窮

延平
府志

林 嶼

補

嶼福州人右科首選慶元中以閤門舍人守

潮州

題觀稼亭

在潮州西北山唐貞元間御史中丞
李宿建

咫尺移文喚卽磨此亭便可配韓亭溪流橫過一灣
碧山色平分兩岸青落日鐘聲鳴遠樹半空塔影倒
寒汀雲煙滿目皆親種留與邦人作畫屏

廣東通志

重關西湖

鏡奩平處小橋西橋外輕鷗掠鏡飛鑿破青雲放山
出撥碧蘚引湖歸帶煙插柳陰雖瘦趁雨栽荷綠已
肥欲借禽魚祝君壽君恩寬大此情微

開

新堤喜繞幾紆縈挈榼攜壺出滿城萍破煙紋容棹
過石開雲罅著人行亭浮橫照波中影僧拾殘霞樹
杪聲不必鳳凰山上問此山東向面湖平

潮州府志

鄭鄭夢補

鄭夢建安人

游洋州崇法院

曉色熹微麥隴閒杖藜徐步扣禪關
雨澆水足東西堰一抹雲收南北山
世路飽諳驚歲晚佛巖燕坐覺身閑
故園早辦歸來計莫待星霜滿鬢斑

陝西通志載此詩跋云建安先生得句法于石湖范公早以文章名世今觀是詩如藍田之珍荆山之璞不假雕琢而自為至寶僧正顯刻之精藍當山水清絕處乃復著此澄澹簡潔之語使讀之當有蕭然脫去世網之意者矣嘉泰癸亥四月既望洋州教授張續跋

高頤補

頤字元齡甯德人慶元五年進士歷知永州
東安縣有政聲學以立誠爲宗著有雞窗叢
說詩集解學者稱拙齋先生

支提禪寺

石龕金佛一千身不到支提孰認真
髣髴鐘聲鳴翠阜晶熒燈焰下蒼旻
平生夢想煙霞際今日來游髣髴
髮新踏破禪牀秋月皎水雲閒淡入精神

甯德志

黃 圭 補

圭德化人慶元五年進士海豐尉

宿儀林寺

探幽適興訪儀林休聽春蛙說雨深翠竹黃花新般
若青山綠水舊知音禪盟蘇晉情相契酒戀淵明醉
且斟此去雪峰應不遠肯容杖履謾相尋

德化縣志

俛

翼補

翼號澹齋羅源人慶元己未特奏名官潮州
秋曹太守爭一死囚不遂其意拂袖而歸調
口甯丞不赴掛冠歸朝廷嘉之特賜緋進秩
奉議大夫年八十餘卒

句

三尺有關人命重一官雖去我身輕

寄太守
羅源縣志

張

銜

補

銜字周甫一字周叟羅源人慶元中為太學生與同舍生楊宏中等六人上疏觸韓侂胄怒編管五百里外後赦還用蔭奏補授官嘉定元年十月詔褒錄慶元上書六人後知韶

州

聖水寺

聖水山南蓮萼輝徘徊花下蝶雙飛春風助我晨遊

興月上層巒照拂衣

羅源縣志

張天翼

補

天翼福州人慶元五年特奏名

同顧狀元玉文登瑞巖

迢迢何處覓仙關翠竹蒼崖夕照閒
倦鳥依依穿石磴落花歷歷點苔斑
春殘幾負層霄約首白甯辭絕壁攀
乘興相攜遙躡屐一樽聊與賦青山

宋詩拾遺

葉紹翁補

紹翁字嗣宗建安人著有靖逸小稿一卷

宋百家詩存小傳云嘗居錢唐卜隱於西湖之濱與葛天民往來酬倡辭澹意遠頗耐人咀味如春色滿園關不住一枝紅杏出牆來至今膾炙人口梅屋許棐贈詩云聲華馥似當風桂氣味清於著露蘭斯言可謂雅稱著有四朝見聞錄摭羅遺佚足補正史之缺

西湖秋晚

愛山不買城中地，畏客長撐屋後船。
荷葉無多秋事晚，又隨鷗鷺過殘年。

遊園不值

應嫌屐齒印蒼苔，十扣柴扉九不開。
春色滿園關不住，一枝紅杏出牆來。

葛天民隱居

種竹成新列，移蘭卽舊陰。
老鐘猶有耳，古柳已無心。
得句添杯滿，貪爐到夜深。
篝燈聊點校，春水沒衣砧。

訪隱者

不作王門夢來敲。隱者關童先。孤鶴化雲伴，一身閑。
礙筍新移路，低牆爲看山。幾回松下，去鋤得茯苓還。
和葛天民呈吳翰仲韻賦其庭館所有

江遠潮痕細，城回路勢斜。竹行穿砌筍，風墮過牆花。
篆葉蟲留字，銜泥燕理家。三人清到骨，相對只杯茶。

題孫端甫別墅

幽居地僻少人知，野水春風枳樹籬。檢歷豫尋移竹
日，題牆閑記種花時。堪嗤狡兔須三窟，只學鷓鴣占
一枝。淨埽綠苔斟濁酒，鄰家吹過野棠梨。

發長安堰

夏老蟲聲切晨興草木香買瓜依綠樹出水捍青秧
船聚知村近牛閑覺晝長雙鳧蓮葉蕩無雨故生涼
秋日遊龍井

引道煩雙鶴攜囊倩一僮竹光杯影裏人語水聲中
不雨雲常濕無霜葉自紅我來何所事端爲聽松風

賦葛天民栽葦

葉礙漁舟入叢分水國寬低回藏鷺渚髣髴釣魚竿
蕩戶和萍送溪翁當竹看所憐如許節不耐雪霜寒

九日呈真直院

秋風吹客客思家破帽從渠自在斜腸斷故山歸未

得借人籬落種黃花

以上靖
逸小稿

貓圖

醉薄荷撲蟬蛾主人家奈鼠何

隨隱
漫錄

漢武帝

殿號長秋花寂寂臺名思子草茫茫尚無人世團圓

樂枉認蓬萊作帝鄉

齊東
野語

林拱中

補

拱中古田人

遊虎邱

白虎巖前秋已闌黑雲疎雨洗林巒鐵花煙落石泉

冷羽井苔深霜月寒隱浦疾帆風去飽疎寮森木曉
催丹清齋不許盤餐入辜負湖山冷淡看

我來一榻羨危亭倦步支頤竹杖輕僧聽鐘聲歸寺
急鴉爭林宿壓枝鳴禪機擊撥如鋒起塵袂驅除似
水清風定夜虛聲轉寂杯茶精舍一燈明

虎邱志

彭巖肖

補

巖肖字龜峰崇安人慶元中領鄉薦年八旬
餘嗜學不倦

清獻梅

清獻堂前樹無枝可著春豈知三百載復有種花人

全閩詩話云彭巖肖嗜學不倦詩文窺韓杜
一戶庭拍肝劍腎無一字輕綴縣尹楊補植清
獻梅命賦云云

閩詩錄丙集卷十一終